

四庫全書

集部

欽定四庫全書

山谷集卷十二

宋 黃庭堅 撰

六言詩四十七首

題山谷石牛洞

司命無心播物祖師有記傳
衣白雲橫而不度高鳥倦
而猶飛

題潛峯閣

徐老海棠巢上

徐陰樂道隱於藥肆中家有海棠數株結巢其上時與客巢飲於其間

王

翁主簿峯菴

王道人參禪四方歸結屋於主簿峯上嘗有毛人至其間問道

梅藥破顏

冰雪綠叢不見黃甘

次韻公擇舅

昨夢黃梁半熟立談白壁一雙驚鹿要須野草鳴鷗本

願秋江

次韻王荊公題西太一宮壁二首

風急啼鳥未了雨來戰蟻方酣真是真非安在人間北

看成南

晚風池蓮香度曉日官槐影西白下長干夢到青門紫
曲塵迷

有懷半山老人再次韻二首

短世風驚雨過成功夢迷酒酣草元不妨準易論詩終
近周南

啜羹不如放麇樂羊終愧巴西欲問老翁歸處帝鄉無
路雲迷

有惠江南帳中香者戲贈二首

百鍊香螺沈水寶薰近出江南一縷黃雲繞几深禪想
對同叅

螺甲割崑崙耳香材屑鷓鴣斑欲雨鳴鳩日永下帷睡
鴨春閒

子瞻繼和復答二首

置酒未容虛左論詩時要指南迎笑天香滿袖喜公新
赴朝參

迎燕溫風旒旒潤花小雨斑斑一炷煙中得意九衢塵
裏偷閒

有聞帳中香以爲焚蠋者戲用前韻二首

海上有人逐臭天生鼻孔司南但印香嚴本寂不必叢
林徧參

我讀蔚宗香傳文章不減二班誤以甲爲淺俗却知麝
要防閒

次韻韓川奉祠西太一宮四首

萬靈未對甘泉五福間
祀迎年旂旗三游半偃風馬雲
車闐然

白旄下金神節青祝攜御爐香
百禮盡修亳祀九歌不
取沈湘

紫府侍臣鳴玉霜臺御史生風
官燭論詩未了知秋自
屬梧桐

泰壇下瑞雲黃雨師灑道塵香
便回猶承墜露金鉦半
吐東牆

題鄭防畫夾五首

惠崇煙雨歸鴈坐我瀟湘洞庭欲喚扁舟歸去故人言
是丹青

能作山川遠勢白頭惟有郭熙欲寫李成驟雨惜無六
幅鵝溪

徐生脫水雙魚吹沫相看晚圖老矣箇中得計作書遠
寄江湖

折葦枯荷共晚紅榴苦竹同時睡鴨不知飄雪寒雀四

顧風枝

子母猿啼榭葉山南山北危機世故誰能樗里穀中皆
是由基

題劉將軍鵝

箭羽不需春水籀文時印平沙想見山陰書罷舉羣驅
向王家

寂住閣

陳留宿一瓚堂
因書為寂住閣

莊周夢爲胡蝶胡蝶不知莊周當處出生隨意急流水

上不流

深明問

象蹋恒河徹底日行閻浮破冥若問深明宗旨風花時
度窗櫺

次韻石七三七首

從來不似一物妄欲貫穿九流骨鯁非黃閣相眼青見
白蘋洲

生涯一九節筇老境五十六翁不堪上補黼黻但可歸

教兒童

萬里草荒先墾六年蟲蠹羣經老喜寬恩放去心似驚
波不停

為君試講古學此事可賤天公君看花梢朝露何如松
上霜風

幽州已投斧柯崇山更用憂何早喜龔鄒冠豸史浩又聞

張董上坡

舜民
敦逸

看著莊周枯槁化為胡蝶翾輕人見穿花入柳誰知有

體無情

欲行水繞山圍但聞鷓鴣化鵬飛女憂須髮盡白兄歎江
船未歸

贈高子勉四首

文章瑞世驚人學行剗心潤身沅江求九肋鼈荊州見
一角麟

張侯海內長句晁子廟中雅歌

無咎樂府
於今第一

高郎少加筆

力我知三傑同科

妙在和光同塵事須鉤深入神聽他下虎口著我不為
牛後人

拾遺句中有眼彭澤意在無絃顧我今六十老付公以
二百年

再用前韻贈子勉四首

胸中有度擇人事上無心活身只麼親情魚鳥儻然圖
畫麒麟

行要爭光日月詩須皆可絃歌著鞭莫落人後百年風

轉蓬科

句法俊逸清新詞源廣大精神建安才六七子開元數
兩三人

醉鄉閒處日月鳥語花中管絃有興勤來把酒與君端
欲忘年

荆南簽判何和卿用予六言見惠次韻奉酬四首
仕宦初不因人富貴方來逼身要是出羣拔萃乃成威
鳳祥麟

何侯賦我菁莪何敢當不類歌顧我乃山林士看君取
將相科

覆却萬方無準安排一字有神更能識詩家病方是我
眼中人

覓句真成小技知音定須絕絃景公有馬千駟伯夷垂
名萬年

蟻蝶圖

胡蝶雙飛得意偶然畢命網羅羣蟻爭收墜翼策勲歸

去南柯

謝人送栗鼠尾畫維摩二首

謝胡藏之

貂尾珍材可筆虎頭墨妙疑神頗知君塵外物真是我
眼中人

丹青貌金粟影毛物宜管城公只今為君落筆他日聽

我談空

一作畫圖
見金粟佛

挽詞三十三首

神宗皇帝挽詞三首

文思昭日月神武用雷霆制作深垂統憂勤減夢齡孫
謀開二聖末命對三靈今代誰班馬能書汗簡青

釣築收賢輔天人與聖能非光唐六典度越漢中興百
世神宗廟千秋永裕陵帝鄉無馬跡空望白雲乘

帝德全三極師臣論九疇丘陵忽為谷天地不藏舟河
朔功無憾幽燕策未收嗣皇朝萬國任姒正興周

司馬文正公挽詞四首

元祐開皇極功歸用老成惟深萬物表不令四時行日

者傾三接天乎奠兩楹堂堂寧復有埋玉慟佳城

國在多艱日人如大雅詩忠清居沒世孝友是生知加
璧延諸老橐弓撫四夷公身與宗社同作太平基

獻納無虛日居然迹已陳清班區玉石寶歷順星辰更
化思鳴鵲遺書似獲麟易名無異論今代兩三人

毀譽蓋棺了于今名實尊哀榮有王命終始酌民言蟬
冕三公府深衣獨樂園平生兩無累憂國愛元元

范忠文公挽詞二首

信道雖常爾知人乃獨亨書林身老大諫紙字敲傾
去三山動人危五鼎烹保全天子聖几杖送餘生

公在昭陵日文章近赤墀空嗟伏生老不侍邇英帷去
國幾三虎聞韶待一夔誰言蓋棺了新樂鎖蛛絲

韓獻肅公挽詞三首

鬱鬱高陽里生才世不孤八龍歸月旦三鳳繼天衢梁
壤吾安仰人亡道固臞空令湖海士愁絕莫生芻

物產元希世風流更折衝決疑京兆尹富國大司農遠

業終三事仁聲達九宗方祈酌周斗何意輟秦春
淚盡才難日斯人遽隕傾冰枝憂木稼食昂恨長庚名
與具茨重心如潁水清堂堂萬夫表直作閑佳城

王文恭公挽詞二首

先皇憑玉几末命寄元勲賓日行黃道攀髯上白雲四
時成歲律五色補天文不謂堂堂去今為馬鬣墳
宥密深黃閣光輝極上台藏舟移夜壑華屋落泉臺雨
紉誰為挽寒笳故作哀傷心具瞻地無復衮衣來

宗室公壽挽詞二首

昔在熙寧日葭莩接貴游題詩奉先寺橫笛寶津樓天
網恢中夏賓筵禁列侯但聞劉子政頭白更清修

昧旦鳴珂路春朝禁殿班方看分寶玉何意作丘山燕
入風榮舞花開日笑顏空餘杜陵淚一爲漢中潛

黃潁州挽詞三首

恭惟同自出數世復通家惠沫霑枯涸忠規補過差曾
中明玉石仕路困風沙尚有平生酒秋原灑菊花

臨民次公老論事長輿通袖有投虛刃時無斲鼻工風
流前輩近名實後人公不謂三日別今成萬事空
公與汝陽守人間孝友稀鵲鴿鳴夜雨棠棣倚春暉粉
省雙飛入泉臺相與歸哀笳宛丘道哀涕不勝揮

叔父給事挽詞十首

元祐宗臣考十科公居八九未為多功名身後無瑕點
孝友生知不琢磨

平生治獄有陰功忠孝臨民父母同贛上樵夫談卓令

宣城老吏識于公

三晉山河數十州頻年水旱不能秋我公出把司農節
粟麥還於地上流

更生苦訟石中書宰掾非人欲引裾兩帥弄兵幾敗國

同時御史更誰如

帥一作猾

曾發公家鉅萬錢溝中襁褓却生全三齊水後皆禾稼
不殺耕牛更可傳

軍容百萬轉風雷獨料王師不戰摧三籩非書公對獄

元豐天子照姦回

隴上千山漢節回
掃除民賊不爲灾
蜀茶總入諸蕃市
胡馬常從萬里來

廊廟從來不在邊
黃扉青瑣慶登賢
除書未試回天筆
何意佳城到馬前

榮祿常恩澤九宗
山摧梁壤併成空
百年遺恨誰昭洗
他日諸郎有父風

晉地無戎卧賊曹
民兵賜笏解弓刀
六年講武儒冠在

不蹋金門著戰袍

文安國挽詞二首

七閩家舉子百粵海還珠往日推忠厚窮年領轉輸一
牀遺杖屨萬事委錙銖豈有蒼茫恨歸巢未拮据

平生翰墨學空走使臣車瞿令能倉史歸公好古書秦
山刊日月周鼓頌畋漁不見龍蛇筆新乾研滴蜍

樂壽縣君呂氏挽詞二首

歸裝衣楚楚家世印累累來作箕帚婦不忘蘋藻詩居

然成萬古何翅謁三醫
騎省還秋直霜侵鬢脚衰
剪髻賓筵盛齊眉婦禮閑
謂宜偕白髮忽去作青山
大夢驚胡蝶何時識珮環
哀歌行欲絕丹旌雨班班

山谷集卷十二

欽定四庫全書

山谷集卷十三

宋 黃庭堅 撰

銘八十首

洪州分寧縣藏書閣銘

并序

分寧縣有學所從來遠矣然邑子諸生賴學以成就者少挾書以游四方者多蓋在官常曰獄訟之不得其情賦租之不登其時簿書朱墨之不當其物寇盜

發而不輒得是吾憂也若勸學養士二千石之任也
故廟學巋然未嘗過而問焉彼蓋不知養士之源發
於縣鄉爲民父母豈聽獄求盜之謂哉今吾宰延平
胡君器之之爲縣左規而右矩謹名而務實教之用
經治之用律其聽民不怠其牧民不煩豪吏斂手困
窮得職然後盡心於學乃舉其鄉先生與一經之師
位之以師友而作興可學之民弟子常溢百員器之
率其僚潔牲酒豆籩釋奠春秋諸生陞降成文耆老

歎息則合謀曰羣居講學常病無書今令君不鄙我
民使得燕居以勤已事其大惠也惟是公家力不能
者吾儕其勸成之於是學有職及諸生之父兄皆自
勸市書以給諸生之求且爲出入之不嚴不可以保
存暴寒之不時不可以持久又相勸作書閣并祭器
而藏之閣成謁諸令君令君乃以元祐八年夏五月
丁丑釋菜於先聖之廟而告成焉諸生則以告黃庭
堅而請銘之於是有問者曰郡有學朝廷爲之擇師

教事備矣縣不興學亦病者乎庭堅曰是不然今夫
浮屠之舍非傳先王之道也而所居如林其墮隳不
守凡有官之君子必左右經營復之而後已關市之
征先王以禁利末其開塞有權今則徒會其入百人
之聚有網漏一金之利必請而張官置吏焉夫士不
可一日而無學民不可一日而無教至於興學聚書
則雖萬室之邑以為非職之憂者何哉此可謂有為
民父母之心知發政之先後之序者乎諸生曰信如

子之言請并書以詔後之人則序而為銘曰

凡治有條如機於紡經經緯緯積寸成兩管蒯之手簡
功於紉可席可屨不能以寒昔此廟學終歲蓬艾聖師
所居風雨無蓋今誦聖言皆有夏屋爰及方冊字以華
閣華閣渠渠言行之林聿求古今自觀德心咨爾諸生
永懷茲道勿嬉勿驚以迪有造得意自己書不盡言如
御琴瑟聽於無絃幕阜几几吳味楚尾其下脩水行六
百里山川之靈或秀于民世得材用我培其根勒銘頌

成式告爾後無或墮之永庇俎豆

分寧縣三堂銘

求瘼民
肥靖共

茂宰蕭公來拊我民自初訖茲惠政日新父母慈之知其苦樂吏瘦民肥猶求其瘼靖共在堂敬畏在庭賓禮士子有渭有涇我名三堂式頌式勸繼蕭公者無墜斯憲

洪州武寧縣東軒銘

并序

溫陵呂晉夫爲武寧縣其轡勒足以御史其俎豆足

以和民以其身為綱以其僚為紀其有所急也民以
為義其有所漏也民以為仁於其歲豐民間新作東
軒以告豫章黃庭堅曰以此聽民非以勤民也予觀
今之為吏訖三年則解體不治民亦厭之今呂侯不
得代踰四歲矣而勤民如始至之日民亦安樂之唯
恐其去也故銘以勸來者

呂侯為邦如匠規矩除治燕處不即歌舞於以近之問
民疾苦里無追胥抱孫買鉏吏無重糈其虎為鼠我班

王春民在東臯于耜于餉勸其作勞亟其耘耔無慢于
教役乃暇日于茅索綯桃李兌矣松竹芭矣知我民稼
雨澤時矣萬物芸芸自本自根於其並作我觀其復富
貴游雲荷戈而逐呂侯燕處不棘其欲東軒高明有突
有榮以納日月以陳鼓笙侯在東軒左經右律燕及其
僚射侯酒食咨爾後來式鑒斯今無以豆觴費民寸陰

晉州州學齋堂銘

并序

甥洪駒父主晉州學作齋堂諸名來乞銘予老病不

復能文各作數語以勸學云

駕說堂

仲尼之駕說矣茲儒將復駕其所說乎元元本本大道
甚夷毋以曲學誘諸子於亡羊之岐

樂泮堂

思樂泮水仁義之海見賢思齊聞過則改

典學堂

立則參於前坐則布於席樂則詔於鍾鼓宴則列於飲

食誰能出不由戶而不終始典于學

見堯堂

立則見堯於堂寐則見堯於夢道其常而因物之自然
是堯之日用

稽古齋

學之求于先王我占四方維天有斗執先王之道以御
今之有是謂古人不朽

緝熙齋

緝者絲治熙者火治維心之本先作而悠遠高明蓋養之以浩然之氣學之有緝熙聖功也哉

渴日齋

學未竟日西入明追今終弗及

時術齋

禹初撫功洪水滔國作十三載民降丘宅君子觀於蟻而知學之可積

敬業齋

慢游者日失一日敬業者不速而疾

尚友齋

今之君子吾既與偕昔者吾友舜何人哉

切偲齋

思而不學無所於覺故謂之殆學而不思萑葦不治故謂之罔切切偲偲相勸以兩

游藝齋

色荒者使人躑躑酒荒者使人漠漠游於六藝之林是

謂名教之樂

知困齋

知之曰知之不知曰不知雖聖人亦若是其知者有輕千里而學之其不知者有輕千里而告之

優仕齋

君子無一日不學也豈惟日哉無一時不學也豈惟時哉無須臾不學也學哉身哉身哉學哉

浮筠亭

豐肌秀骨先後輩出何其孺子也解祿樂羣不舍晝夜
何其學士也壯節臞躬不知歲寒何其丈夫也

君子亭

君子藏器待時盤桓於不中也反身自觀

李元中難禪閣銘

并序

龍眠道人李元中為宜春決曹掾盡心於犴獄忠信
慈惠於百度訟者伏辜而即罪如罪在已治罪之器
人服而病焉如傷在已卹其寒飢疴癢加以保惠教

誨使宥者渙然而悔杖者自今而悔流者在塗而悔
死者方來而悔孔子曰子產衆人之母也而書言不
盡其行事未知其能若是乎獄事既飭於是築閣以
退聽已無憾而後安禪而乞名於其友山谷道人山
谷曰菩薩久習勝妙禪定於諸三昧心得自在哀閔
衆生欲令成熟捨第一禪樂而生欲界是名菩薩難
禪可名曰難禪閣龍眠曰若是則吾豈敢不勉焉
請為我銘之山谷曰勸已以不倦勸同事以不倦勸

萬物以不倦故曰難爾夫禪又何難銘曰

難一作義

正念現前常樂我禪於法不難生死險地施物無畏於法不易能易能難則無難易俎豆鳩毒使令虎兕蛻乎其無功澹乎其無味至道之極不出於聖人萬物之祖不歸於天後百世而見堯舜忘義忘年不動不禪坐無

生禪

義一作人

洪龜父清非齋銘

是是非非知者之別是謂是非謂非直者之發其別也

以成自其發也以成他吝其非而不改惟自屈也大人
能格君心之非是心術也方寸之間與萬物為市掃除
不涓照用則瞠目清其非虛室晰晰

洪駒父壁陰齋銘

并序

甥洪芻駒父仕為黃之酒正勤其官不素食矣又能
愛其餘日以私於學名其所居曰壁陰齋余內喜之
曰在官而可以行其私也惟學而已矣為之作銘

惟道集虛觀我鏡中年耆典學考道則窮潛聖語道朝

聞夕死調高不和千世一士觴豆舞歌不愛其光孰能
劬書自憂面牆挾書呻吟白駒過隙我以道僧何直尺
璧古者寸陰不易千乘之國得道之根則有枝葉務華
絕根安事熒熒渴日者握苗罪歲者不芸耔勿亟勿遲
能時者謂之君子

洪玉父照曠齋銘

萬物一家本無疎親小智彼我與鄰斷斷聞是法音不
懼不惑乃可與之方轂道域至道無域門戶唯空無物

可欲萬竅自風乃即萬物親疎異同冬裘夏葛渴汲飢
舂父慈子孝兄友弟恭占筮筮吉卜龜龜從子是之學
擴而心量遠之大之是謂照曠

李商老殖齋銘

以心爲田我耒耜之慈祥弟友種而茂之忠信不貪苗
而立之敦厚敬恭水而耨之師友琢磨耔而薈之先王
遺言又時雨之仁義有年左右取之相彼寒窶我則與
之奉以饗帝神其吐之

王子舟所性齋銘

道行不加窮處不病此之謂性由思入睿由睿入覺此之謂學性則聖質學則聖功謂予不能倒戈自攻天下求師四海取友道立德尊宗吾性有

鮮自源廣心齋銘

細德險微憎愛彼我君子廣心無物不可心不運寸中積瑣瑣得失戚戚忿欲生火然爐傾則焚我中和沃以遠大井泉無波天下爲量萬物一家前聖後聖惠我光

華

鮮自源貴稀亭銘

閩州城南天下稀有此金石句聞諸杜叟鮮子築屋與
山相賓知味者稀以自貴珍貴者欲得良貴名立非得
非名至貴無級

王良翰行庵銘

剪椽作庵駕以人肩利用行遠琴几後前衲子師之行
坐俱禪涉江東西浸湖南北視之庵也行遠有足器成

便人用之日新創物之智艾王君申

洪鴻父脩然堂銘

詩書環列竹石陰岑有無言子自鉤其深穀士挽弓會
予心術敲朴問道慈惠哀恤自公鞅掌退食靜淵東窓
置榻蟬蛻脩然

正平堂銘

畏首畏尾不自尊已牽於勢刑於利虐鰥寡以奉高明
是謂不平忠不足而詐有餘躬不行而責從令是謂不

正夫平者如執權衡以司重輕如天四時不言自行夫
正者渴飲而飢食冬裘而夏葛喜怒予奪由已而不由
物故行天下而不屈靈龜負圖告人凶吉剗腸在前中
黑如漆楊子老思思配甯遽涪翁爲名周旋其樞

養浩堂銘

心者氣之君氣者心之將君之所愾將應如響心淵如
淵氣得其養夫惟氣之爲物憂則焦然怒則勃然羞則
難然懼則瞿然勞則瘁然飢則悴然酌其有餘不足而

用其中爾乃浩然而浩然之主人風義凜凜白髮在堂
雞鳴在寢弟兄鴈行肴饌歡飲三子承學皆有英稟穆
如清風松竹交蔭富貴浮雲公但高枕

養源堂銘

李子作堂歐陽子名曰養源以成其福祿不知其源及
所以養而問諸山谷山谷曰江出汶山其才濫觴其浸
荆楚匪舟不航非以有源而受下流多故耶行潦之委
盈溝溢壑少焉雨止立觀其涸故曰必清其源源清則

流潔必深其源源深則流長是故有令德者百世不忘
李子進曰若夫其源既得聞命矣敢問所以養之何如
山谷曰智及十年則知蓺木持百年而不知蓺人智不
保其身況其子孫欲其源清且深其人其人

靈龜泉銘

并序

發皖口而西四十里泉淙淙行山徑亂石間謂其來
甚遠乃不能三里裂石而發源坎甃清澈魚鰕輩遊
見其中頂有大石如龜引氣出源上酌泉飲之愛其

甘問泉上之人曰是不知水旱下而為田其溉種五百斛於是原德嬖形命曰靈龜泉而銘之

雲淙淙兮山木造天亂石却走兮扶屋椽有龜闕首兮足尾伏匿閱游者兮不知年鍾一德兮養靈根漱石齒兮吐寒泉中深可以濯纓下流可以濯足挹旒兮未病多瓶罌不休其汝覆雖不能火而兆兮吉凶不欺唯汝

卜

明月泉銘

明月堂冽甘井材旨酒利用茗於谷簾實季孟賞音誰
徐望聖

玉泉銘

玉泉坎坎來自重險發源無漸龍窟琬琰我行峽中初
酌蛙頷迨嘗百泉無與比甘山僧拙戇煮瓶羹糝我以
瀹茗泉味不揜行爲白蛇止爲萬鑑矢其明德以勒蒼

厂

嚶尊銘

并序

癭尊庭堅得之舅李公擇以獻仲父聖謨仲父懷寶
不沽晚受福於巖壑鉤深而望遠得意而忘歸載酒
乞言賓客從之此尊魁磊譎詭得巧匠而成器也晚
其所容盛足以宴山川之暇日仲父撫尊曰斯其以
惡駭俗汝為我銘以曉客庭堅曰

甕盎遺老宿瘤三逐說桓佐宣名顯齊國相士實難執
柯其則擁腫樛句不受繩墨斲為雷尊於酒為德君
子提攜與居同壽子子孫孫勿替用酒

張益老十二琴銘損

澗泉

震陵孤桐下陽岑音如澗泉鳴深林二聖元祐歲丁卯
器而名之張益老

香林八節

河渭之水多土其聲厚以沈江漢之水多石其聲清而
不深香林八節是謂天地之中山水之音

號鍾

薄則播厚則石侈則作弇則鬱長角則震無此五疾則
鳴而中律是謂號鍾之實

玉磬

其清越以長者玉也聽萬物之秋聲者磬也室如是中
藜藿不再食以是樂飢不以告糴

松風

忽乎青蘋之末而生有極於萬竅號怒而實無夫其蕩
枝播葉實其實而脫其枯風鳴松耶松鳴風乎

媧簧

鍊石補天之手截匏比竹之音雖不可得吾知古之猶
今木聲犁然當於人心非參寥者孰鉤其深

南風

聲歌南風舜作則欲報父母天罔極

舞胎仙

琴心三疊舞胎僊肉飛不到夢所傳白鶴歸來見曾元
龍頭松風入朱弦

秋思

秋風度而草木先驚感秋者弦直而志不平攬變衰之色為可憐之聲不戰者善將傷手者代匠悲莫悲於湘濱樂莫樂於濠上

漁根

襍禡夫須蕭然於萬物之表槁項黃馘闐然於一葦之杭與鷗鷺而物化發山水之天光驚潛鱗而出聽是謂漁根

九井璜

鉤魚而得九井之璜辟紂而遇六州之王堙沈乎射鮒之谷委蛇乎鳴鳳之堂其音不爽維其德之常

天球

天球至音不以人力作者七人傳以華國有蔚者桐僵于下陽之霆奏刀而玉質成器而金聲山川畀之耶其天性之耶

虎胎冠銘

并序

積中弟惠虎胎冠未出包殼文章炳然嘯谷風弭百獸不旋日矣取而加於元服所以昭示尚文老夫得之竊懼維鷗之刺故作銘以自解

漆園老言作聖冠皐比文質稱吾衰矣文不昭服班然作虎羞深衣幅巾九節竹尚與斯文嘯空谷

洪龜父深衣帶銘

貧不能畏賤不能憂以身行道如水于舟

一云居貧不恥處賤不憂

洪駒父深衣帶銘

務華絕根自斧斤處厚居實萬事畢

潘子真深衣帶銘

在車在寢風雨顛沛有其忘之道不人外

王子鈞深衣帶銘

養心欲誠擇術欲精自知欲明責人欲輕

孫知微畫玩珠龍銘

目精不逃薩埵降魔相也肉怒鬱偃排雲天而上也垂
胡眈眈玩夜光也跳波突漩大物所推盪也偉哉太古

筆神智匠也銘之者誰山谷放浪也積藏者誰成都大
聖慈寺園通和尚也

頤菴銘

并序

雲巖老法清結草菴於古木間直溪東旌陽峯山光
清明一塵無間河東柳敬叔名之曰頤菴雙井黃庭
堅予之銘

藏山於澤而非止天下雷行而非動自我觀頤為吾大
用口則挂壁補飢瘡則食執頤之樞何慎何節

跨牛菴銘

并序

吉州太和縣普覺禪院其東北皆脩竹長老楚金開
息軒於竹間予作縣時嘗謂金為我結草菴於竹北
金方經營經藏未暇也他日菴成予已去金知予隨
食於四方不能有是菴也則自名曰跨牛而乞予銘
金蓋學牧牛於鄧峯永永學牧牛於黃蘗南南無牛
來者穿鼻焉永牧牛者然其牧不勤其牛不煩金之
牛純白矣跨而不敢下恐其蹊人之田予之與佛者

游觀蹊田之牛其角觶觶如金之能自牧者蓋寡矣
故作銘

唯水牯牛頭角堂堂以作意力徧行道場舉頭看月終
不角抵浮鼻渡河蹴蹋源底三界為田衆生為稻由我
深耕世無寸草我跨此牛無繩與鞭要下即下馬後驢
前

蓮花巖銘

自古在昔雷雨電擊天開八石青蓮跏鄂中有巖壁牀

數宴息大士密迹置鉢倚錫翫虺避宅虎豹服役行人
護戒如龜藏六以戒為甲如蓮生泥不染香色維巖居
無數

三峽橋銘

二山劒立瀧落天路北垂康王之簾南曳開先之布銀
潢傾瀉起蟄千雷斲山為梁無有壞隤驪龍守珠不可
釣罩式告游者登危思考

默堂銘

聞道之度或默或語言而不信以默自許

墨軒銘

賢問墨說煙出松節不如此說即波旬說

戎州舍利塔銘

維我戎州治漢熸道鉤帶二江撫有蠻獠王德無外來
享疏犒在邊文武卧鼓弗考維時父老崇佛宮廟道人
在純法中杜多捨所懷壁嚴宰堵波寶積輝騰舍利
五色僧伽生息師之骨身匪玉匪石大善知識功德之

餘用福蠻方三灾不作百穀有年上天降康歲攝提格
元符天子萬壽無疆涪翁作頌不顯其光以昭方將此
第七級不爰衆力檀者陳防吠瑠璃餅白金為牆施者
周章

無等院生臺銘

呵利底母衆以血食為命探懷取嬰兒而其父母愁痛
如來慈威力為開甘露門乃救清淨衆受食施已分稱
誦五如來及佛金口敕粒粒遍十方施衆生飽滿彼呵

利眷屬化形來受供若有彈射者死墮畜生道若彼慳貪心謂少不飽衆是人違佛敕死入餓鬼道司馬竦旦秦母夫人白氏琢石作生臺以施無量故獲福亦無量

竦旦秦司馬

氏三子名

法雲寺金剛像銘

善才訪道海絕處鑄金莊嚴萬物睹道人公麟規範土
鳧氏翟用司火度在元祐元秋白露檀越張侯冀公主
法雲秀公第一祖

法雲寺水頭鑊銘

圓通師大蘭若冀公主捨脂澤無量鑊慈悲杓來者酌
聞尚檀從智作

研銘三首

其堅也可以當謗者之鑠金其重也可以壓險者之累
卵其溫也可以消非意之橫逆其圓也可以行立心之
直方如是則研爲予師亦爲予友善友在前良規在後
精則入神勤則見功堅如是重如是乃能時中固窮在

道涉世在逢

制作淳古可使巧者拙夸者節性質溫潤可使躁者靜

戾者聽觀槩几而見研忘其一室之懸磬

一本無其字

溫而栗重不泄不為礪砥為翰墨守不假人永終吉

楊大年研銘

公無恙時於此翰墨其作也萬物受澤其不作也羣公
動色至於破塵出經萬物昭明人言楊公不如石之壽
我謂石朽而公不朽

周元翁研銘

刻其中以有容實其踵以自重緋衣漆室盟濯致用風
櫺垢面蛛網錯綜游於物之儻然吾與爾同夢

晁以道研銘

惟矩也有隅惟深也有瀦策勲於六書惟重也不反不
側惟溫也文明之澤君子以婉德石在臨洮其所從來
遠矣毀璞而求之成圓器者鮮矣藏器待時勿亟勿遲
毋抵毋墜毋盜之誨

任叔儉研銘

鎮栗密緻其宜墨而不敗筆也叩之鏗爾手之所及如雲生礎其有玉德也礪而不二美其質也生石之淵中正砦之蠻溪蛾眉之別也得而器之任廣叔儉丹稜之傑也相而銘之山谷老子豫章之枿也

任從簡鏡研銘

瀘川之桂林有石黥黑瀘川之人不能有而富義有之以爲研則宜筆而受墨唐安任君從簡之硯面爲鏡而

背三足形駭天下若山林不若而不得訪諸禹也松煤
泛之若玄雲之過魄月而竚也筆胥疏其上則吾宮中
之免也握筆之指爬沙若蛙欲食月不能而又吐也任君
宗易從簡以官守不能至焚而屬余同年生賀慶孫之
子成章持烏石硯屏來乞余銘其鏡研余沒其研屏以
為研而與之銘而使復求烏石以為屏烏石研材
視萬州之金崖中正砦之蠻溪兄弟也而白眉耳

鮮自源研銘

剗心以為地寬而不吝時墨而不瀦以為日新其寬也
似道坦坦其日新也用而不癯

歐陽元老研銘

其堅也似立義不易其潤也似飲人以德叩之鏗然如玉如金歐陽元老笙磬同音

王子與研銘

溫潤而澤故不敗筆縝密以栗故不涸墨明窗淨几宴坐終日觀其懷文而抱質

檀敦禮硯銘

用為砧不可以調杵擣衣用為鼓不可以退盜塞旗用

為鏡不可以鑒美惡用為礪不可以御賓客檀公三十
六策戎匠鑱石刊其四封以為管城之國旁陳玉斗挹
水以和墨時渴而飲之給出不竭礪筆礪墨宜日書紙
涪翁勒銘有告無止

王子飛研銘

厚而靜似仁剛而溫似德不反不側似宜翰墨

鄭欽相研銘

韜兮虛其心籠古而絡今惟子翰墨林坦兮實其踵不

震不竦其承不要角浪沄沄不瑕其溫園以行世不規其盆

李伯牖女子研銘

既非牛渚望夫之石又非上虞幼婦之碑琢為海昏節婦之硯堅潤而含風漪其以付伯牖之孤女他日或能衛夫人之筆札曹大家之文詞

江氏芝木銘

為江懋相作

江望陳留漢轅侯德七祖兆于園南七祖窆于園北起

居之阡既有拱木歲行三十一舍喪客土者二十有六
宗子有孝子使客歸其宅爰發其祥緇芝紫莖凡園南
北孝思作則



山谷集卷十三

欽定四庫全書

集部

山谷集卷十四

詳校官庶吉士臣胡鈺

檢討臣何思鈞覆勘

總校官進士臣朱鈐

校對官編修臣盧遂

謄錄監生臣韓宗孝

欽定四庫全書

山谷集卷十四

贊八十首

宋 黃庭堅 撰

江氏家藏仁宗皇帝墨蹟贊

昭陵仁聖與天同功不刻不雕萬國文明日月照臨無
有隱側一滴之雨澤及萬物簡言易從易言易知皇祖
有訓信如四時雷聲不作天地淵默遺黎懷仁賈泣翰

墨

卷十四

錢忠懿王畫像贊

文武忠懿堂堂如春中有樗里不以示人雷行八區震驚聽聞提十五州共為帝民送君者自崖而反以安樂其子孫九萬里則風斯在下眇大物而成仁

王元之真贊

天賜王公佐我太宗學問文章致于匪躬四方來庭上稍宴衍公舍瓦石責君堯舜采芝商山以切直去惟是

文章許以獨步白髮還朝泣思軒轅雞犬舐鼎羣飛上
天真宗好文且大用公太阿出柙公挺其鋒龍怒鱗逆
在廷岌岌萬物並流砥柱中立古之遺直叔向以之嗚
呼王公其尚似之

東坡先生真贊三首

子瞻堂堂出於峨眉司馬班揚

一作嚴揚

金馬

一作金門

石渠閣

士如牆上前論事釋之馮唐言語以為階而投諸雲夢
之黃東坡之酒赤壁之笛嬉笑怒罵皆成文章解羈而

歸紫微玉堂子瞻之德未變於初爾而名之曰元祐之
黨故之珠厓儋耳方其金馬石渠不自知其東坡赤壁
也及其東坡赤壁不自意其紫微玉堂也及其紫微玉
堂不自知其珠厓儋耳也九州四海知有東坡東坡歸
矣民笑且歌一本有義形于色為國山河一日不朝其間容戈至其
一丘一壑則無如此道人何

岌岌堂堂如山如河其愛之也引之上西掖鑿坡是亦
一東坡非亦一東坡槁項黃馘觸時干戈其惡之也投

之於鯢鯨之波是亦一東坡非亦一東坡計東坡之在天下如太倉之一稊米至於臨大節而不可奪則與天地相終始

眉目雲開月靜文章豹蔚虎炳逢世愛憎怡怡五

一作立

朝公忠炯炯

寫真自贊五首并序

余往歲登山臨水未嘗不諷詠王摩詰輞川別業之篇想見其人如與並世故元豐間作能詩王右轄之

句以嘉禾寫寄舒城李伯時求作右丞像此時與伯
時未相識而伯時所作摩詰偶似不肖但多髯爾今
觀秦少章所蓄畫像甚類而瘦豈山澤之儒故應臞
哉少章因請余自贊贊曰

飲不過一瓢食不過一簞田夫亦不改其樂而夫子不
謂之能賢何也顏淵當首出萬物而奉以四海九州而
享之若是故曰人不堪其憂若余之於山澤魚在深藻
鹿得豐草伊其野性則然蓋非抱陸沈之屈懷迷邦之

寶既不能詩成無色之畫畫出無聲之詩又白首而不
聞道則奚取於似摩詰為若乃登山臨水喜見清揚豈
以優孟為孫叔敖虎賁似蔡中郎者耶

吏能精密里行嫻卹則不如兄元明而無元明憂疑萬
事之敝斟酌世故銓品人物則不如其弟知命而無知
命強項好勝之累蓋元明以寡過而知命以傲世如魯
直者欲寡過而未能以傲世則不敢自江南乘一虛舟
又安知乘流之與遇坎者哉

或問魯直似不似似與不似是何等語前乎魯直若甲若乙不可勝紀後乎魯直若甲若乙不可勝紀此一時也則魯直而已矣一以我為牛予因以渡河而徹源底一以我為馬予因以日千里計魯直之在萬化何翅太倉之一稊米吏能不如趙張三王文章不如司馬班揚頗頗以富貴酖毒而酖毒不能入其城府殺之以世故豺虎而豺虎無所措其爪角則於數子有一日之長道是魯直亦得道不是魯直亦得是與不是且置勿道

喚那箇作魯直若要斬截一句藏頭白海頭黑
似僧有髮似俗無塵作夢中夢見身外身

張大同寫予真請自贊

秀眉廣宇不如魯山槁項黃馘不如漆園韜光匿名將
在雙井談玄說妙熱謾兩川枯木突兀死灰不然虛舟
送物成百漏船

張子謙寫予真請自贊

見人金玉滿堂而不貪看人鳳閣鸞臺而不妬自疑是

南岳懶瓚師人言是前身黃叔度

故樊道廖君畫像贊

并序

廖君翰字仲良治生有猗頓之材知子有朱公之智
初居郁鄢而遷于樊道推郁鄢之田以業其兄買山
於夷戶即其人以耕稼不征其財力數年遂役屬數
百家而富以十倍乃大治產居延儒學以為子師禮
游士以為子友命子琮為進士遂登嘉祐二年進士
第戎人仕於朝自琮始君年三十以郡吏與夷戰於

馬鳴溪敗績自沒水中流數里或獲以舟得不死後
五十年而為士大夫家有法居戎州第一君壽七
十九而終里人愛之故有畫像于壽昌院後三十年
琮以承議郎致仕家居贈君某官思配前人之德乃
新畫像之室而請余為之贊

廖君樸邈卒享五福其艱其勤天畀戩穀治生之材可
以治邦知予之智可以使能耄老于鄉以福孫曾在爾
後人思其艱勤思其好賢維衣食之源瞻像思孝勿墮

其教

故江陽楊君畫像贊

并序

楊君存道累世以儒學知名薦於鄉乃登治平四年
進士第於予為同年進士其為人孝弟慈祥其文學
鄉先生以為可宗其為吏不愧古之長民者不幸年
四十九而卒其葬也予為贊其畫像以教其鄉縣之
子弟云存道諱從居江陽久矣莫知其所從遷也贊

曰

顯允臨邛吏師文宗能者述之德宇恢恢疎而不失有
物實之於義當然確乎不奪強者屈之愛民如子曰予
用威誰其卹之圖像如生雖不能言誰敢忽之其事在
人歲月其逝勿墜失之後有南董詢事考言尚其筆之
故陳氏畫像贊

女歸能婦義止宜家誰其向道探深見遐入古人室立
妙法句自履實地告人悟處忽爾心疾累歲狂癡為忘
我難使人厭之迨其解化莊語告戒堂堂夫人凌鄭同

派

喬令真贊

抱璞而居其誰別玉喬君不獻自尊兩足窺其獄戶視其邑庭吏無重糶民有頌聲提平如砥持廉如水觀其中公清有餘相其貌固凡入耳

文勛真贊

榮如辱如誰喪誰得萃如嗟如不見聲色為吏不殘去其敗羣好賢喜士黽勉而勤子克家吾稅駕舍幾而寢

漠然即化眉目在圖慰爾時思藹然粹溫似無恙時

李冲元真贊

冶百鍊之金而中黃鐘之宮琢无瑕之玉而成夜光之
璧可用饗帝可用活國師曠不世而無聞韞積藏之而
無悶士亦何得於山林元勛而蓋穀也故肥遯

宋喬年真贊

士之坎壈以其智多因坎壈以為師用其多以見已相
遭於功名之會圖像麒麟獨行於寂寞之濱照影溪壑

大者四時爾小者風雨爾豈真我哉

宋宗儒真贊

宋子勃宰心有古鏡朝四暮三為笑不競放一捻一猶
著禪病探丸起死味藥知性憂患不入乎盃中抱胡琴
而風聽若乃脫冠袒裼捫蝨應客目如愁胡拊髀而呼
是必追橡栗於雲杪探水月於江湖然後快於心與

陶兀居士贊

眉山吳元祥得意於酒與世相忘者吏應之贊之曰

兀兀陶陶陶兀兀是醒是醉布衣簪紱涪翁乃名之陶兀居士而增贊之

兀兀陶陶借書借不得陶陶兀兀問字問不得是醒是醉佛也會不得布衣簪紱有人扶使得

史應之贊

眉山史應之愛酒而滑稽對鄙不肖醉眼一笑司馬德操萬事但好東方戲嘲驚動漢朝窮則德操達則方朔天地一壺不膠者卓應之老矣似愚不愚江安食不足

江陽酒有餘

麟趾贊

麟有趾而不踰仁哉麟哉有定而不抵仁哉麟哉有角而不觸仁哉麟哉今之人一朝之忿以觸人滅身辱親嗚呼人中有獸獸中有入

筇竹杖贊

厲廉隅而不劇故竊比於彭聃之壽屈曲而有直體能獨立於雪霜之後伯夷食薇而清陳仲嘏李而瘦涪翁

畫寢蒼龍掛壁涪翁履危心如殲石窮山獨行解兩虎
爭終不使卞莊乘間而孺子成名

義松贊

洪州西山
翊真觀

西山之松有歲寒之質懷其同氣耶既分矣復合而為
一泜露雲雨老大霜雪匠石輟斤樵夫歎息人之同氣
去本未遠宰上之杞蔽蒂成陰有其干戈日尋余不知
其何心

三笑圖贊

卷十四
二豪之所爭不滿三隱之一笑三隱之所笑不解耶舍
之顏耶舍之印霧鎖雲埋九年面壁此印方開

倦鶴圖贊

子瞻畫石伯時為作
歸鶴余題曰倦鶴圖

偉萬里之仙驥
壯九關而天翱
亦倦飛而歸止
矧人生之嗟勞
饑食北山之薇
蕨寒緝江南之
落毛安能作河
中之桴木寧為
籬落之繫匏

席子澤槩礪圖贊

百遇毒而成醫
九折臂而信道
慈子而長人之
幼愛親

而壽人之老蓋嘗飲長桑之丸而得耆域之草此天地之仁氣也而席子以遊方之內知萬化之如今忘一世之遺我臨流濯足脫帽箕坐寄槁竹以孤唳晒秋葉之驚墮此天地之義氣也而席子以遊方之外觀壑若陵對卿若兵客或箴之曰俯仰之間禍之橐也虎不可暴河不可乘席子笑而應之曰此天地之強陽氣也誰能以久生於是方噓竹葶繖膜眼吟弄風月使客忘返吾但恠其多能不窮不知去方朔之近遠

趙景仁彈琴舞鶴圖贊

無山而隱不褐而禪聽松風以度曲按舞鶴而忘年鏗
爾舍琴而對吏忽坐入而來前察朱墨之如蟻初不病
其超然

胡逸老吳生畫屏贊

兩虎戲搏文章露千林號風雷欲雨慎勿私鬪傷爪距
豺狼野子即當路

易生畫麋猿猴獼猴贊

穴居木處相安以飲食生渴饑愛憎無師而自能其皮之美也自立辟其肉之肴也故多兵風林露壑伐木丁丁雄雌同聲去之遠而猶鳴彼其不同臭味故眴目而相驚惟蟲能蟲惟蟲能天余是以觀萬物之情

畫墨竹贊

人有歲寒心乃有歲寒節何能貌不枯虛心聽霜雪

畫牧牛贊

鼻之柔也以繩牧之心之柔也以道牧之縱而不蹊人

之田其誰早服之

畫馬贊

御與馬相得維予止作萬里不日而復士志於學則亦無息以師友為轡策及其至焉維爾力

黃庭畫贊

君誦黃庭內外篇本欲洗心不求仙夜眎片月墮我前黑氣剝盡朝日鮮一暑一寒久自堅體中風行上通天亭亭孤立孰旁緣至哉道師昔云然既已得之戒不傳

知我此心未虧騫指我嬰兒藏谷淵言未絕口行已旋
我記其言夜不眠

觀世音贊六首

海岸孤絕補陀巖有一衆生圓正覺八萬四千清淨眼
見塵勞中華藏海八萬四千母陀臂接引有情到彼岸
涅槃生死不二見是則名為施無畏八風吹播老病死
無一衆生得安穩心華照了十方空即見觀世音慈眼
設欲真見觀世音金沙灘頭馬郎婦

自心海岸孤絕處戒定慧香補陀伽觀身實相淨聖果
自度衆生大悲願一一浮漚鏡本空八萬四千垂手處
夢時捉得水中月親與獼猴觀古鏡

聖慈悲願觀自在海岸孤絕補陀巖貫花纓絡普莊嚴
度生如幻現微笑有一衆生起圓覺即現三十二應身
壁立千仞無依倚住空還以自念力

以法界印印諸善根以平等印普印諸業八萬四千母
陀臂諸佛承我稱提力八萬四千清淨眼衆生依我成

正覺補陀巖下白花風月照海漩三昧底

聖慈悲願觀自在小白花山住道場海漩三昧覺澄圓
三十二應施無畏有一衆生發大心願度我身及舍識
萬仞峯前撒手過觀音豈復異人乎

敬禮補陀巖下水邊十方三世無不現前願我亦證空
覺極圓處慈悲救火中生蓮

江南李後主夢觀世音像贊

補陀巖中大慈聖滄浪石上觀生死南州麼聖師子王

感夢白衣施無畏夢回洒筆具光相照鏡還與我面同
當時若會照鏡句放下江南作閒客

了觀師繡觀音贊

六合內外若有不觀音處則此絲縷不能堅固橫此三
十二應共此一光明聚了觀觀音自知金針落處知落
處女媧補天夜夜雨

龐道者繡觀音贊

道者侏儒從山谷累年自請予云家富於財父母死

無兄弟年三十不娶聞山谷食素遂盡散其貲與族
人作頭陀從山谷不衣帛不臥榻一齋之外水亦不
飲

八萬四千唯兩臂三十二應無來往悲觀一切造諸業
慈觀諸業熾然住清淨觀時無本根幻影重重蒙古佛
有能出世自觀音即受老翁無畏施

南山羅漢贊十六首

第一尊者賓度羅跋羅墮闍崑崙兒奉金匣國

王坐前瑠璃花盆正坐左右手作印前有香印
小僧奉鉢國王取火然香印

大阿羅漢賓度羅奉持末後如來印日中一鉢千家飯
處處作佛事饒益以我身心五分香作光明雲雨大千
取火燃香世界主能遍法界唯心辦

第二尊者迦諾迦伐蹉迦濕彌羅國王坐

正一作

右手作印坐前瑠璃盆花崑崙奴奉經匣國王
作禮

佛記一切賢聖衆皆以無為有差別如來乃至阿羅漢
同入涅槃三昧海二乘設不見此理是則波旬顛倒想
稽首迦諾迦伐蹉看花結印同無相

第三尊者迦諾迦跋釐墮闍合左右手作印胡
奴奉經小僧持課

駕羊超出風火宅跨兔求度生死河者乘如來初方便
自徹海漩三昧底三乘如來悲願力身如光影現十方
持經不染文字相是名第一離欲者

第四尊者蘇頻陀左手持經小僧傾瑠璃瓶水

飲虎

斑斑之獸本山林升堂入室作輿衛小僧奉施軍持水
弭目來受救渴供胸中猛虎自調服是故異物成一家
我觀閻浮提衆生同牀猜忌若冰炭

第五尊者諾矩羅阿氏多西面彈指胡奴執印
杖小僧奉瑠璃器中有兩孔雀尾

稽首具六波羅密稽首得無生法忍稽首佛敕久住世

稽首救世不倦者天上人間福田施心無高下依佛慧
遍與有情作功德故受孔雀墮尾供

第六尊者跋陀羅住在耽沒羅洲面西坐疊左
右手國王奉如意小僧合掌

能以一切聲聞佛能以法忍出世法宴坐分身應十方
不取涅槃自饒益伏住泥沙觀止水中有菩薩清涼月
無明風起作浪波方會如來同覺海

第七尊者迦理迦執白拂小僧奉匣胡奴濾水

佛光影中大杜多八萬細行滅塵勞愛護有情如眼目
胡奴來供瀝水囊手持白拂起清風奉持所聞佛直指
小根魔子欲橫戈弓折箭盡皆消實

第八尊者伐闍羅吠多羅指顧有所言小僧作
香篆胡奴奉香篆臺肩掛淨水寶餅

百和香中本無我光透塵勞一一法佛法本從空處起
炳然字義照太空以此一香應發心東方出日西方雨
我今稽首伐闍羅是真離欲阿羅漢

第九尊者戎博迦住在香醉山中執羽扇胡奴

奉金爐小僧奉來禽

香醉山中夏木陰來禽磊磊承風霧山鳥衝飛墮聖前
小僧澡雪羞時供胡奴知是說法時故奉金爐聽時事
有說法相無言說無說無聞是真說

第十尊者卑訛迦住在三十三天長眉持數珠

小僧合十指天王獻鈴杵

龐眉寂默坐空禪萬年一念無緣促手珠猶作奢摩他

寄迹普賢修萬行梵天來獻瑜伽具問人親見世尊來
撥開眉目示梵王諸天皆得法眼淨

第十一尊者羅怛羅持經小僧奉經帙國王跪
坐

一身入定多身出屈申臂頃四天下如世篋藏諸有物
及以絲縷舞工木小兒贊歎或恐怖耆老智者但袖手
佛說神通方便力度脫衆生具功德

第十二尊者那迦犀那持印杖小僧合掌胡王

獻七寶

四十九年大教主波旬請故入涅槃佛身常尋法界住
非其境界故不見未法衆生少福田衆魔染衣汗戒律
稽首那迦住世間令我常生遇佛想

第十三尊者因揭陀振金錫龍擾坐下國王獻
鈴

如來寶仗降魔相慈悲威怒震十方毒龍帖耳收雷霆
逆麟可摩若家狗我法未嘗惱衆生不令肆毒生恐怖

但以本來悲願力情與無情共一家

第十四尊者伐那婆斯受國王獻寶塔國王胡

跪胡奴奉塔坐

八萬四千寶浮圖不如一念心清淨惟此有相檀施福
三塗八難所依怙佛以一花示迦葉笑中有刀世不解
而以法盡付諸人深藏寶骨待梅里

第十五尊者阿氏多奉手爐國王注水灌蓮花

盆小僧奉花

萬山相倚碧巔岼靈鷲一峯聖賢宅如來往昔經行處
林泉鳥獸皆逆向清淨眷屬千五百無日不聞鐘磬音
閻浮提中大福田蓮花會上菩提記

西一作回

第十六尊者注茶半託迦合掌受龍女獻珠案

上設鈴杵小僧奉手爐

持軸山中大慈聖普應諸供作佛事雖設大鈴金剛杵
如世休馬橐弓矢龍女來獻九淵珠無心奉施無心受
清淨之衆見尋常相視還如土木偶

見翰林蘇公馬祖龐翁贊戲書

一口吸盡西江水
磨却馬師三尺觜
馬駒蹋殺天下人
驚雷破浪非凡鱗
馬祖龐公水泄不通游
鯨方樂抖斗生角

清涼國師真贊

摘裴休語

寶月清涼寂照法界以沙門相藏世間解谷響入耳性
不可為青蓮出水深不可窺萬象紛披花開古錦啟迫
羣氓與甘露飲哲人去矣資何所參即事之理塔鎖終

南

木平和尚真贊

一尺三寸汗脚草鞋掛龍牀角他日清凉半座果然未
忘禮樂一一漚菓木平稽首一漚前覺

南安巖主大嚴禪師真贊

石出山而韻自丘壑松不春而骨立冰霜今得雲門柱
杖打破鬼窟靈牀其石也將能萬里出雲雨其松也欲
與三界作陰涼此似昔人非昔人也山中故友任商量

南安巖主定應大師真贊

定光古佛不顯其光古錘透穿大千以為囊臥像出家
西峯參道亦俗亦真一體三寶彼逆我順彼順我逆過
即追求虛空鳥迹驅使草木教誨蛇虎愁霖出日枯旱
下雨無男得男無女得女法法如是誰奪誰予今君威
怒免我伽梨既而釋之遂終白衣白帽素履須髮皤皤
壽八十二與世同波窮巖草木枯腊風雨七閩香光家
以為祖薩埵御天宋有萬姓乃錫象服名曰定應

黃龍南禪師真贊

我手何似佛手日中見斗我脚何似驢脚鎖却狗口生
緣在甚麼處黃茆裏走乃有北溟之鯢揭海生塵以長
背鳥啄其心肝肺乃退藏於密待其化而為鵬與之羽
翼九萬里則風斯在下矣自為鑪而鎔凡聖之銅乃將
圖南也道不虛行是謂無功之功徧得其道者一子一
孫而已矣得其一者皆為萬物之宗工以丹墨得皮得
骨我以無舌贊水中月

大為詰禪師真贊

即邪是正即藥是病乞水指井乞飯與甌殺人如麻出
邪命定而得正命尸羅清淨而八萬四千清淨是謂毗
盧遮那正法眼藏以平等印封之以僧伽梨蒙之無心
者來彈指門開聖凡不盡金鎖生苔丹青回互南北呈
露影落千江誰知月處

五祖演禪師真贊

問道白雲端跼著自家底無心萬事禪一月千江水路

逢摩登伽石上漫澆水赤土畫簸箕也有第一義誰言
川嶽直具相三十二

慧林中禪師真贊

廓然豁爾師不自知工何能寫昧然行爾工以為真師
不謂之假金然玉爾物自賓之木然石爾孰能親之維
丹青不能新之其孰能陳之

法雲秀禪師真贊

法雲大士天骨巖巖如來津梁我實荷擔手捉日月斷

取莊嚴國士入此佛土位置城南有目無目疑聖疑凡
擊大雷霆布灑甘露大圓鏡中慈悲威怒維此象法依
正法住後五百歲亦莫予敢侮誰為請主世界主女

泐潭乾和尚真贊

平常心是道南泉只眨得眼菴內人不見菴外事趙州
猶是擔扳秋毫不穩方丈前萬仞深坑但到牢關拄杖
子天下橫行平如鏡面實如石師子借問是誰泐潭道
人萍鄉老子

泐潭我和尚真贊

枯木突兀傲睨萬物頂門上眼正法中骨

長蘆夫和尚真贊

松枯竹瘦是其歲寒也山高水深不可犯干也取多國
士莊嚴此土如陶家手也拂除方丈置榻而坐一不受
也首出萬物淵默雷吼寂寥者之參也若夫以法界印
印毛印海則驚僧繇而走巫咸也

雲蓋智和尚真贊

哆哆和和搭猿左科喫十方飯唱快活歌任疎慵沒禮
數趕則去招則住住似著衫去如脫袴禪徒苦口勸和
光捏聚虛空要泊路

仰山簡和尚真贊

不戒而六和恭敬不禪而十方清淨不學而文理井井
不吏而施於有政壽八十餘閱人三世孝於塔廟勤力
勤禮百室崇成檀者疊疊齊始如終薪窮於指耄老而
精明豐肉而神清和同而不濁退屈而不陵是謂大雅

之士惜乎其不發諸朝廷

黃龍清和尚真贊

黃河徹底凍白髮通心白雖有顧陸手百巧畫不得

大通禪師真贊

前波法涌後波大通大通法涌徹底澄空圓照願海千
漚一實圓通法流滔天沃日三世一念十方見前銅崖
鐵壁不可攀緣見即彈指蹉過萬千大則偏圓異位通
則真假同源觀者著眼是傳非傳

寶梵大師真贊

穆然而肅毗尼藏也熙然而溫同塵相也默然而說法
中龍象也知文知武染衣將相也淵然而深飽儒術也
悠然而思入詩律也鉢囊如空不受實也室中生光無
長物也十有七年為法城塹也五十八夏圭璋無玷也
斬然而秀出火宅也溲然而化薪大息也子孫繩繩奉
承丹青眸子睥睨明五觀其役物之智袖手微笑人挹其
臨財之清

山谷集卷十四

欽定四庫全書

山谷集卷十五

宋 黃庭堅 撰

頌九十首

具茨頌

帝省具茨在國南屏篤生韓公補天子聖文武韓公其
德庭方靡職不宜乃宣力四方四方維則歸補我衮職
西羌不庭王師濯濯奏功不時公請命行公出撫師王

師矯矯羌戎震驚其藪澤是狩復我王土將築於河之
潁人亦有言功不在初其潰於成陰有齒牙以猾覆城
天子聖神知我公孔武公雖歸止四方以無侮京師之
屏公曰維許樂土赫赫王命北門是處公治北門有條
有葉夷根披節蝨賊是伐惠及鰥寡日用飲酒萬有千
載樂公壽考公御宴喜樂酒溫克賓秩醉飽柔嘉維則
維公之德萬有千歲畀公遐福陟彼具茨松柏孔碩若
濟巨川維舟楫是度瞻彼具茨有奔其陰如彼歲旱視

公作霖公至北門河潤九里公歸本朝萬物露雨帝顧
具茨公歸廟堂為天下師傅於大隗有光於大隗有光
公壽考無疆

曹侯善政頌

井序

曹侯者嘉祐中為益陽令有善政既去而民思之以
地寒故州將及監司皆不能推挽致之要津以盡其
才久之亦馴致為尚書比部員外郎知賓州以歿
時其子堯封財五歲其文書皆族人藏去為火所傷

盡失其事特有後知益陽縣事齊術參酌民言為異
政錄其大槩予三讀而悲之夫曹侯之政徹機械
而去虎是難能也至於惠民之政是可能而人不為
也曹侯之政不可使無傳故作頌饒之益陽縣中蓋
曹侯為縣御史嚴而不殘使民寬而不弛納民賦租
不以累其僚雖新雨既晴雪雲陰暄未嘗閉倉庫而
不受租一斗者輸一斗租一石者輸一石吏卒不能
與民為難民皆歌舞而歸異時大駟儉仕家子與吏

為姦以官為市攬納以制民之命輸五斗者當入十
於此皆逃入他境舊令尹死官下其子堙替為隸貧
甚為人傭書侯與資令納婦不幸病死侯又歛之民
有家產而無男以二女囑其弟而死其弟凍餒其二
女且役之過時而不嫁侯捕其弟杖之擇愿民壻其
二女析其父家產之半而業二壻侯至之始其邑多
虎所在設機弇日以得虎而虎暴不息侯曰是為政
之罪命盡去機弇未踰月負販山行水宿不逢虎也

觀其人善政必多尚按齊君所錄如此曹侯柳入諱
靖字中立內行孝友當官所至有績頌曰

曹侯輟耕學于上國進士起家為吏有績雖窶人子孔
武且碩我惠我威養我如子我勤我暇不借吏史虎暴
入境肆作機穽侯曰徹之病在乎政惟此戾蟲迺與政
通風林岑蔚征夫不逢我作頌聲與民歌之不誣方將
俾勿磨之

清閒處士頌

至樂山中嘉木之槪有人天游風雲為馬鷗鷺為舟有
詩客李發字之曰清閒處士而蜀有豪士王當以為蓋
謝敷之流其清也不登市井之隴其間也不歟王公之
鈞傲睨萬物逍遙一丘身與長松共老名與北斗俱休
涪翁曰名之不稱實也久矣吾子何以是為哉書潞則
失涿謂鷹則化鳩故一以我為馬一以我為牛蓋有有
其實而不受亦有無其實而固求者也常試為吾子道
清閒之致乎水之為物甚寒而極清鬱為堅冰得溫而

釋遍利諸生雲之為物無心而出岫穴風休雨息反一
無跡我觀古人以是為則若夫汙泥濁水與蛙同生不
閤其清自操井曰日耕荒徼未嘗不閒惟有道者能藏
於天吾子何處焉清閒曰我無所用於世而從所好惟
水雲與之忘老何敢以為有道涪翁曰舐痔十乘曹商
自優非君清流商財計得白圭擬國以閒為隱雖然同
一大夢達者先覺方在蟻垤憂樂計校也世無公孫僑
孔仲尼誰辨夢覺亦曰舉世溷濁惟我獨清萬法本閒

而人自擾擾爾

王厚頌二首

八風動搖人不間五穀自鬻鬻毛斑文章書畫當富貴
惟有如今至樂山

夕陽盡處望清閒想見千巖細菊斑人得交游是風月
天開圖畫即江山

荅楊明叔送來頌

買竹為我打籬更送來來作飯用此回光反照佛事一

時成辦不須天下求佛問取弄臭脚漢

謝張寬夫送樓耳頌

菜茹之品樓耳君弄龍割耳鼈脫帟張子羞我助貧餐
桑鵝楮雞不足云曲肱一飽南風薰萬事於我如浮雲

乞笋於廖宣叔頌

龍蛻骨掉蒼尾餘戢戢漫蛇虺棄雨中心爛死携長鏡
戴簪子可盡髡馘在耳

奉約宣叔頌

貴魁梧賤瑣尾強分別
蛭憐虺雨新霽月未死欲循城
將數子煩置酒摘蒼耳

戲答宣叔頌

探龍淵履虎尾別狐貉辨虺頭
雪白心灰死老斲輪
不教子君聞此當洗耳

清醇酒頌

為李才
雙作

清如秋江寒月風休波靜而無雲
醇如春江永日游絲
落花之困人借之以涪翁清閒鑒
此杯面錄本之以李

叟孝友成此甕中春

醇碧頌

井序

荊州士大夫家菘豆麴酒多碧色可愛而病於不醇
田子醞成而味厚故予名之曰醇碧而頌之

田子綠麴妙在蒸蓼女酒兀者美生其手挹彼而清注
茲無聲其香馥郁悅可飲者如春霖霽清不病醕多不
疾人誰其吐之百室之醕醇碧惟師老夫不飲評以鼻
慧

安樂泉頌

并序

鎖江安樂泉水味為楚道第一姚君玉取以釀酒甚清而可口又飲之令人安樂故予兼二義名之曰安樂泉并為作頌

姚子雪麴杯色爭玉得湯郁郁白雲生谷清而不濃厚而不濁甘而不噉辛而不螫老夫手風須此晨藥眼花作頌顛倒淡墨

玉醴頌

為廖宣叔作

北郭子竹林居醞玉醴撥浮蛆味橘露色鵝雛春盎盎
想可鮪魚枕蕉正關渠來問字儻借書掃三徑待雙魚

荔支綠頌

為王公
權作

王牆東之美酒得妙用於六物三危露以為味荔支綠
以為色哀白頭而投膏每傾家以繼酌忘螭魃之躩觸
見醉鄉之城郭揚大夫之拓落陶徵君之寂寞惜此士
之殊時常生塵於尊勺

筇竹頌

偉邛崃之美竹初發跡於犛犛有山而不險有水而無
波金聲而玉節故貫四時而不改其柯郭子遺我扶余
澗阿坐則倚胡牀斐几行則隨青笠綠蓑吾衰也久矣
視爾畏友子琢子磨百世以俟聖人而不惑則涪皤不
負筇竹危而不扶顛而不持惟筇竹之負涪皤

視爾一
作親爾

澄心亭頌

菩薩清涼月游於畢竟空衆生心水淨菩提影現中忍
觀伏塵勞波澄泥著底八風動地來塵勞還復起覺海

性澄圓浪時無不渾即渾即澄徹箇是涅槃門

白蓮庵頌

入泥出泥聖功香光透塵透風君看根元種性六憲九
竅玲瓏

了了菴頌

方廣菴名了了了了更著菴遮又要涪翁作頌且圖錦
上添花若問只今了未更須侍者煎茶

休堂頌

頭上安頭如何得休殺佛殺祖方得按堵此鬱單越西
瞿耶尼事同一家喫飯著衣向上一路千聖眨眼韓信
打關張良燒棧

退堂頌

愚者日進智士日退象蹋恒河徹底過大千世界百雜
碎愚人尋文弄章句更覓中間及內外

拙軒頌

覓巧了不可得拙從何來打破沙盆一問狂子因此眼

開弄巧成拙為蛇畫足何況頭上安頭屋下蓋屋畢竟
巧者有餘拙者不足

贈嗣直弟頌十首

并序

涪陵與弟嗣直夜語頗能明古人意因戲詠云人皆
有兄弟誰共得神仙故作十頌以記之此二句唐赤
松觀舒道士題赤松子廟詩也

饑渴隨時用悲歡觸事真十方無壁落中有昔怨人
去日撒手去來時無與偕若將來去看還似不曾齋

正觀心地時絲髮亦無有却來觀世間冬後數九九
涪陵薩埵子且道也旁行亦嚼橫陳蠟不愛孔方兄
江南鴻鴈行人言好兄弟無端風忽起縱橫不成字
萬里唯將我回觀更有誰初無卓錫地今日更無錫
江南十兄弟長被時一共夢時各自境獨與君同夢
雖受然燈記不從然燈得若會翻身句彌勒真彌勒
向上關捩子未曾說似人困來一覺睡妙絕更通神
往日非今日今年似去年九關多虎豹聊作地行仙

扣程德裕頌五首

貧子還家作富兒
糞箕苔蒂未曾遺
人人欲問草書意
懷素從來自不知

鵬飛逼塞滿空虛
蚊睫安巢却有餘
臘月火燒三界盡
從來灰裏撥真如

山河大地目前機
橫按吹毛更不疑
萬里無人無寸草
凍山亭上與誰欺

如來刹刹與塵塵
北斗南箕透法身
金粟默然軻好辯

唱歌須是帝鄉人

石田耕種難成稻
茶蓼栽來只苦辛
萬物一家真富貴
使君見後却清貧

贈劉靜翁頌四首

鄭明舉贈劉靜翁四頌
勸之捨俗出家
詞旨高邁
玩之不能釋手
然靜翁在家出家
無俗可捨
因戲作四頌以贈行

念念皆空更莫疑
心王本自絕多知
艱勤長向途中覓

掉却甜桃摘醋梨

一甌一鉢非難辦
住得山時更莫來
千年糞掃堆頭物
優鉢羅花特地開

萬緣空處真如佛
八面風中不動尊
困便橫眠饑喫飯
十方無壁又無門

淨名龐老摠垂鬚
君幸元無免破除
心若出家身若住
何須更覓剃頭書

再答靜翁并以筇竹一枝贈行四首

南鴻北鴈年年客有箇生涯主不知撼動從來憂樂事
夜窻風葉響棠梨

栽松道者身先老放下鋤頭好再來八萬四千關捩子
與公一箇鎖匙開

一筇九節添行李用得人間處處尊只要上山行飽飯
莫將風雪打入門

萬事實頭方穩當十分足陌莫蹉除困來展席日裏睡
讀盡空中鳥跡書

再答并簡康國兄弟四首

瞿曇不解祖師機，却許狸奴白牯知。
道人只要貧到骨，沈却黃金賣策離。

妙舌寒山一居士，淨居金粟幾如來。
玄關無鍵直須透，不得春風花不開。

須彌椎打虛空鼓，撼得毗盧海月昏。
四海無波安樂住，陳家松下小柴門。

日中一飯蒙頭睡，黃葉堆門莫掃除。
夜半枕前師子吼。

起來燒却野狐書

曉賢師續佛壽頌

曉賢師講席中蕭洒人也欲乞於檀越度兩出家兒
續佛壽其意甚美故為作頌道之

養子續佛壽非為養色身棒打石師子只要實頭人出
家無正因不得正命食是真出家兒不費秋毫力講得
天雨花說得石點頭人人是檀越負命者上鉤

覺範師種竹頌

簡池覺範道人城東道友也今在簡州景德院其家
風十二時似趙州東院西也種竹兩枝於宴坐軒中

山谷老農作頌

往在江南住竹山道人兩歲三來訪聽風聽雨看成龍
牛羊折角入朝餉簡州城東刮地寒手種檀藥三兩竿
竹成要作無孔笛若有靈龜一任鑽

答雍熙光老頌

獨弄參軍無鼓笛右軍池裏泛漁舟豈知劔外雍熙老

收得黃巢折劍頭

又答寄糖霜頌

遠寄蔗霜知有味勝於崔浩水精鹽
正宗掃地從誰說
我舌猶能及鼻尖

沙彌文信大悲頌

通身是眼不見自己欲見自己頻掣驢耳
通身是手不解著鞭白牛懶墮空打車轆
通身是佛頂戴彌陀頭上
安頭笑殺涪皤

鐵羅漢頌并序

峨眉山下蟆頤津之淵有百鍊金剛鑄成二怖魔
開士人物表儀隨世尺度其中空洞不留一物叩之
鏗然應大應小香塗刀割受供不二沈之水則著底
投之火則熾然水火事息二老相視而笑涪翁曰吳
兒鐵人石心吾不信也二老者真鐵石耳乃為之頌
曰

人言怖魔像非金亦非鐵若作世金鐵開士亦不現禪

坐應念往一鉢千家供順佛遺教故不宣示神通有為
中無為火聚開蓮化無為中有為甘露破諸熱魔子目
怖畏我無怖畏想或欲坯鎔之為己富貴梯賴世主慈
觀虎兇失爪角或得野狐書有字不可讀狐涎著其心
字義皆炳然却來觀六經全是顛倒想今世青雲士慎
莫作此解

枯骨頌

清揚巧笑傾人城驕氣矜色增我慢無始時來生死趣

八萬苦業所依止皮膚落盡露拴索一切虛誑法現前
不見金牛可下刀無垢光明本三昧

髑髏頌

黃沙枯髑髏本是桃李面如今不忍看當時恨不見業
風相鼓擊美目巧笑倩無脚又無眼著便成一片

葫蘆頌

大葫蘆乾枯小葫蘆行酤一居金仙宅一往黃公廬有
此通大道無此令人老

一作慙

不問惡與好兩葫蘆俱倒

缺月鏡頌序

瞭然以破鏡贈與上座涪翁為之作頌

月墜鏡中無滅無生月雖缺半影像圓成

還神罔圓首座戒刀頌

平生受用三尺吹毛歡喜斬新拾得孟勞夢口喚起猶
自忉忉我王庫中無如是刀

題永首座庵頌

奪得邊關馬便休休嗟李廣不封侯分明射得南山虎

子細看來是石頭

勸石洞道真師染袈裟頌

丈夫出家當被

一作披

壞色衣蜀僧袈裟多似茱萸尼輕

羅縐縠染成春柳絲撩蜂引蝶唯欠遠山眉

贈成都六祖沙彌文信頌

塵是文信界是沙彌積塵成世界析界作微塵界喻人
天果塵為有漏因塵因因不實界果果非真因果皆如
幻堂堂出世入

寄六祖範和尚頌

範公頭上著枷涪翁脚上著扭且共彌勒過冬閒坐地
爐數九

羅漢南公升堂頌二首

寶積拾得漏貫錢古佛堂前狗尿天東山日出西山雨
露柱槌胸哭破船

黑蟻旋磨千里錯巴蛇吞象三年覺日光天子轉須彌
失眼衆生問演若

羅漢南公塔頌

一點墨漆元無縫
罅羅漢雲居天上天下出入奮迅三
界無家以除惱禪打鼓弄琵琶沈却法船留下肩斗欲
得不沈肩乾剝漏

和朱宏夫真妄頌

須彌說法大海聽南箕吹折北斗柄
螭螭千眼照世間
保君通達真妄竟

答檀君送含笑花頌

檀郎惠我花含笑借問凝情笑阿誰
一世茫茫走聲利
閻公捉定始應知

戲答寶勝甫長老頌

易拔蒼龍角難參寶勝禪
林泉飽枯澁煙月唱清繇
笑出黃龍手慵扶阿卯肩
持刀欺寡婦盜佛鑄私錢
月黑踰城夜風高放火天
解唾招覺老擔屎汙心田

和斌老悟道頌

終日忙忙本圓覺只為魔強令法弱
不疑更問決疑龜

無病還求除病藥
昔人夢中見捕逐
兩手無繩元自縛
黃鸝臨夢啼一聲
白日當窻始知錯

送賢師往瀘州為兩驅烏乞度牒錢頌

一鳳將兩雛
往乞五色羽
誰有大勢力
成此拮据心
若無出家心
勤苦難成就
但令發弘誓
誰不起慈悲

解瞋睡頌

文殊吐酒臥觀音
被杻械普賢盜鑄錢
釋迦扇鑪韞範
上座殺牛黃魯直害癩

丘字頌

嘗有老僧暴背於後架作此丘字示之問會麼示不
會因以為頌

齋餘睡兀兀占盡簷前日不與一甌茶眼前黑如漆

為慧林冲禪師燒香頌三首

昨夜三更狗吠雪東家閉門推出月是渠覺海性澄圓
衲子殺人須見血

多年破衲不勝針一曲胡笳無古今往日聞韶獨忘味

守株人在月西沈

西瞿耶尼開靜北鬱單越受粥慧林也唱雲門曲去年

臘月六十六

為黃龍心禪師燒香頌三首

老師身今七十六老師心亦七十六夢中沈却大法船
丈殊頓足普賢哭

一拳打破鬼門關一笑吐却野狐涎四海崢嶸龍象眾
鼻頭只用短繩牽

海風吹落楞伽山四海山徒著眼看一把柳絲收不得
和風搭在玉闌干

雨花巖頌彭澤三巖

孤峯中流分江南馬當大雷無一帆波濤掀空鳥不度
天花雨我讀書巖

伏仙巖頌

生死浪中涅槃宅與人同黑非同白誰令避世作聾盲
獨來寒巖伏石壁

補陀巖頌

脩羅身量等須彌入藕絲孔
逃追北補陀巖下不戰人
八萬魔軍皆解甲

題高節亭頌

松風竹雨共談空樓閣參差古
疊重急水灘頭道人住
亦如前佛在因中

彭女禮北斗圖頌

白足禮江沙十星在雲表
洗心無一塵缺月西南曉

頌取之左右逢其原

取之左右逢其原香嚴臘月火燒山對面謾人猶佇思
打得香嚴也是閒

書蔡秀才屏風頌四首


壬午歲

武寧縣中蔡老子能摹能酒又能詩胸中百萬多羅藏
不向人間說是非

接人高下但唯唯笑語相隨不作難此翁曾次有涇渭
事不可處執如山

此翁家世印累累平生俯視造物兒堪笑癡人不省悞
猶說此翁真箇癡

讀經一字禮一拜瘦骨稜稜心苦辛看伊冷淡教人笑
定作閻浮百歲人



山谷集卷十五